

## TIMOTIUSNU NAI 1 PAULUS YOM

### *NAI HAM BUPUAK TAPEB NOKUNU NAI*

<sup>1</sup> Da Paulus, da Kayak, Nug ig edua awikom ele amu, Nug beka Jesus ele a odelah dim lamiten, Jesusnu total danab daatem. Nugib am ig mauhak dimpa hab atan ena daagnignu dab mak aot, madod ele daatemnu diig. <sup>2</sup> Amu da Timotius, oopa genab doyakpa na am da bekalnab daatem amu, da nahipnu udug imu iiku yaatem. Kayak, ig Mamenig, amu Kristus Jesus ele, ahilah ehanitak okai hamu megtep amu ahilah oo gai iita doyak kobol amu ahilah madod ele nahippa daaglagnu ool daate.

<sup>3</sup> Da tatam Makedonia ugeke, nai da na amenpa ami amubia da baula amenpa aтем. Epesus apa, danab laala ag ham bupuak nai danab ah ipuanadna madateb amunu na apa daanna, danab amu tutuku toliadna, ag anam ii amananu amelagpa ape doyeg! <sup>4</sup> Laa ele, ag kaya hamu, alalkad memetalkad onilag kudumnab batak iita ele amunuib aib dab menana madipig. Ag keeke adit amunu matinna, tamaniak oopan danab ah dilag dab mak kaboliteb. Nai ag maditeb ele amu Kayaknu udat ii ehanidte. Iita, Kayaknu keeke am oopa genab doyak, ib amupaib bete. <sup>5</sup> Amge da nai gemu maditem ele, da maditemnu diig am nug oo mauhak kobol amu ba daakunu maditem. Nug oo mauhak amuam danab nug oo opia awak, nug bedupa ab iita, nug Kayaknu

oopa genab tutuku doya, oo mauhak ele doya oite amu, oo mauhak kobol amubiaib bekunu dab mein maditem. <sup>6</sup> Laala ag keeke imu uuna, nai hamuib dim lamidteb. <sup>7</sup> Ag Kayaknu do ipunitak danab daaglagnu oolag daate. Ag ele ateb. “Ig ihinig nai amu genabnab,” amge ag aka am nai amu ii dooteb, nuhig diig ele ii dooteb.

<sup>8</sup> Ig dootem, do nug adi udat hekunu daate ele, danab nug udat amuib dab medate amu, do nug am keeke ena daate. <sup>9</sup> Ig ele dootem, do nug danab tutuku dilagnu ii daate. Iita, do nug danab ag kobol tutuku ii dim lamidteb, ag ode ii dim lamitak adi, ag kayak di metak adi, ag hipunin danab adi, ag Kayaknu hamu bia doonna, wannu kobol dim lamidteb, ag mamelkad anilkad aqaeg mauhte b, ag danab lailkad ele aqaeg mauhte b, <sup>10</sup> ag gapai hete b, ag danab danab o ah ah ele ag gapai ele hete b, ag danab laa yabhok hipaladna daden maadte b, ag nai ham bupyak danab, ag hetodiakpa ham bupunna, “Genab iiku atem,” aon ateb amu, ag keeke laala amubia, keeke amu oh am nai genab enanu keked daate, danab ag amu hete b ele amu, do nug danab amu dilagnu daate. <sup>11</sup> Kobol ag hete b ele amu kobol amu oh am Nai Ena, Kayak Nug da amu mehuqkulnu meidom ele amu, ag Nai Ena ele laipu ii daate b. Nai Ena amuam Kayak nuhigpan udiom daate. Kayak Nug anuqaknab, Nug binag okai ele daate.

***KAYAK NUG PAULUS EHANITAK OKAI HAMU METOM***

<sup>12</sup> Da ihinig Nadi, Kristus Jesus, Nug da gagatag meidom amu, da Nug amegpa, “Ena heme,” awe atem. Adinu? Nug da udat imu hekulu amu, Nug

da di ii medapan elela anida, Nug nuka da udat imunu tituanidom. <sup>13</sup> Anuka da Kayak amu nuhig keeke ele dabaten, awe awe aqami. Da danab nuhikud ehed hadtami, Kayaknu nai nau ele atami amge Kayak Nug dahilnu oo gai iita doyom. Adinu? Da Jesusnu oolpa genab ii doyeye, da ool ele ii maite, da ehed hemi. <sup>14</sup> Amu anuka da anam hemi amge Kayak Nug ihinig Nadinu ehanitak okai elelenab medada, Nug Kristus Jesus udat okai heum, diig amunu dahilnu oo huana mauha he, da oolpa genab doomi.

<sup>15</sup> Nai imu am genab, meu ele amunu ag aona, oolagpa ele genab dooglagu elele. Nai am inam. Jesus Kristus Nug wan imupanu hipunin danab ah edua diikunu udiom. Hipunin hak danab ah oh edatak am daib. <sup>16</sup> Amge diig imunu Kayak Nug dahilnu oo gai iita doyom. Da am hipunin hak danab laa oh edatak amunu Kristus Jesus Nug nuhig oo mak amu nuhig ena hak ele udat dahilpa heeb, miag atieb, danab ah ag amu anidna, ag oolag maiteb, ag ele nuhignu oolagpa genab doona, ag bauklel aoglag. <sup>17</sup> Amu Kayak, Nug am keeke ohnu gumak hanhan daate, Nug ii mauhte, ig Nug anidkunignu elele iita, Nug aakuib am Kayak amunu ig Nug binag onig okai ele hanhan metu! Genab.

<sup>18</sup> O da bekal Timotius, da propet dilag nai tamaniak ag na medapig amunu dab mein, matiak imu na udat hekutnu amenpa atem. Na ban danab ag ena daanna, ban heteb amubia na daanna, udat nahip pehetak he! <sup>19</sup> Na ootpa genab doyak hak ena ele aib padame. Danab laa amu ag amu padapig amunu ahilag oopa genab doyak nug ub

gikud atan ta aoda nauhom bia nauhpig. <sup>20</sup> Kobol amunu amu Haimenias Aleksanda ele a anam hepid. A anam heeh da a tamaniak oopanulamaṭi, dimitim Satan epegpa wapid daatep, amupa a oolah edueb amu a baula Kayak amu nuhig keekenu ele dapadya aoi aoi aqaglahnu ii hemaya.

## 2

### *UNUQITAK ATEM HAKNU*

<sup>1</sup> Amunu da tatam ag tamaniakpa daateb amu ag udat imu hekulagnu oolag maḍ edatem. Ag unuqitakpa, danab oh dilagnu Kayak unuqidnana, ahilagnu ele Kayak amegpa, “Ena heme,” akulag. <sup>2</sup> Ig madod aot, to etat daatta, ig Kayaknu dab mak pehetak aotta, opia awak ele oignignu amu ag king amu gabman dilagnu ele Kayak unuqiteg! <sup>3-4</sup> Unuqitak amunu amu Kayak, Nug ihinig edua awikaknu diig daate, Nug danab ah oh edua diieb, nai genabnu diig dooglagnu oo daate ele amu, Nug unuqitak amunu ena doote. <sup>5</sup> Yo, Kayak laipu daate, gamag danab ele laipu, Nug Kayak amu danab ele gamagpa daate, danab amuam Kristus Jesus. <sup>6</sup> Nug danab ah oh dilagnu Nug nuka Nug bau dayak nuhig uua, amupa Nug haenpanab Kayak Nug danab oh edua diikun hete ipunikom. <sup>7</sup> Diig amunu amu Kayak Nug da nai mehuqak danab, total meidom. Da nai yaatem imu am genabib yaatem, da ham ii bubuitem. Nug da iita adi dilag, ag ele Jesusnu oolagpa genab dooglagnu, ipunitak danab meidom.

<sup>8</sup> Amunu da danab oh ag unuqidk<sub>u</sub>lagnu amu ag opia awaknab daanna, opodi bak iita, oolag adit ele iita daanna unuqidk<sub>u</sub>lagnu ool daate.

### *AH DILAG NAI*

<sup>9</sup> Amubia ah ag tutuku dab menana, lamen elelepaib takana, ag danab ah amelag qekunu ag ikilag udug kobol kobol elepa ii takamnanu, ag danab ah amelag qekunu bala diigdiig, golpa hak o peripa hak o iita lamen laa nob nadinab ele amu ag ii memananu ool daate. <sup>10</sup> Ah ag keeke diigdiig amubia ii memana. Iita. Ag hak ena, ah ag Kayak dim lamidnana, adi adi kobol hek<sub>u</sub>lagnu elele doon henan oiteb ele amu, ah ag kobol amu lamen bia takaglagnu ool daate.

<sup>11</sup> Ipunitak awak haenpa amu ah ag dagom daanna, ipunitak nai aoglag. <sup>12</sup> Da ah laipu laa nug ipunitak ah daakunu o danab dilag iki daakunu aib atem. Nug anam ii daama, nug dagomib daaku. <sup>13</sup> Amu diig am inam. Kayak nug Adam tatam hewowa, dimpa Ewe heum. <sup>14</sup> Laa ele, Adam nug nai ham bupuaknu oopa genab ii doyom. Ah nug nai ham bupuak oopa genab doya he, hipunin beum. <sup>15</sup> Amge ah ag nid awona, atog noadk<sub>u</sub>lagnu udat nadinab henana, “Ig wan imupan udat okai hetem amunu Kayak edua ii awigma,” aib apig. Iita. Ag Kayaknu oolagpa genab doonna, ag oo mauhak kobolpa daanna, ag dab mak tutuku opia awak elepa daapeg amu Kayak nug ag edua diiku.

## **3**

*KRISTEN TAMANIAK GUMAKNU DANAB DILAG NAI*

<sup>1</sup> Nai imu am genab, danab nug kristen tamaniaknu gumak iki danab be<sub>k</sub>unu oo niieb amu nug aaku udat enanu oo mauhte. <sup>2</sup> Amunu laa ag kristen tamaniak gumak iki danab, nuhigpa ehed laa anidkulagnu elele iitanu amu nug tutuku dayad! Nug ah laipu gamu aakuib daya, nug atog noak oiya, nug dab mak babaita, dab mak ena ele atog noa, ena dayaya oiyad! Nug do danab doteb ele amu, ag atog noata, nug danab ah ele nai ipuanadkunu elelenab dayad! <sup>3</sup> Nug le gagatag lanak danab, wagai mak danab ele ii daama. Nug am madod danab dayaya, naipa nug qak ii hema. Nug enubnu ele hik ii qema. <sup>4</sup> Nug baekudpa ena omalata heeb, nug bekod ag nug waapa daanna, ag keeke oh madod kobolpa nug ode dim lamidpeg, nug gumatak udat amu elele had! <sup>5</sup> Am laa nug nug baekudpa atog noata, omalatak ii doote amu nug atemun Kayaknu kristen tamaniak dab madata daku. <sup>6</sup> Kristen bau nug enaen mak, iki okai kobol haaha amu nug Satan na qa nob awom bia na qemanu, nug kristen tamaniaknu gumak iki aib dayom. <sup>7</sup> Laa ele amu danab nug kristen tamaniaknu gumak iki danab daakunu oo daate amu nug dimitim danab, ag noolagpa danab ena iita dayeb amu nug uda neeb, nug Satannu uhuipa nomanu amu nug ag noolagpa ele danab ena dayad!

### ***TAMANIAKNU TOLIAK DANAB DILAG NAI***

<sup>8</sup> Aria Kayaknu tamaniaknu toliak danab amu, ag ele kobol tutuku dab menana, ag danab odelag adit ele ii daamna. Ag le gagatag huana ele ii lamana amu danab enulag hamu yabhok ele ii aomna. <sup>9</sup> Ag oolag opia awak dayeb**eb**, ag

oopa genab doyaknu nai genab amu gagatag adeg!  
 10 Amge tatam ahilag udat enatai o nautai amu atog nona anidna, elele anidpeg amu ag tamaniaknu toliak danab dayeg!

11 Amu ag waalkad ele ag anamib dab mak tutuku aon oiglag. Ag dimug nai ii matimna. Ag tutuku oinna amu ag ham bupuak kobol laa ele ii hemana.

12 Kayaknu tamaniaknu toliak danab, nug tamaniaknu iki waapa daate ele amu, nug ah laipu aakuib gamu daaku, nug nuhig ah nid naunau ele peheta atog noadku. 13 Danab ag Kayaknu tamaniaknu toliak udat elele heteb amu ag anuqak daanna, ag oopa genab doyak nainu gagatag mehuqkulagnu elele daateb.

14 Nakok laa ele amu da na gumite gokulnu dab metem amge gemu da nahippa keeke imunu iiku yaatem. 15 Amunu diig am, da paha na gumite ii gopi amu na nai imu eb gena, na Kayaknu tamaniak atem tolidpe, ena oiglagnu dookut. Tamaniak am Kayak bauklelnu keeke, nai genab diig ele daate. 16 Genab, ig kristen tamaniakpa daatem, ig doyak laa adatem amu doyak amuam lokumak dayeye, gehaib miag atiom. Doyak amuam unuqagnab ele daate. Doyak amuam inam. Jesus Nug danab beđu awa, miag atia beum. Kayak Oudi Nug ig Nug tutukunab ipunike, engel ag Nug ele anidpig. Nuhig nai am danab oh dilagpa uke, wanpanu danab ah ag oolagpa genab doopig. Kayak he, Nug hab atan teum.

## 4

### *TIMOTIUS NUG TAMANIAKNU DANAB AH*

*ATEN IPUANADKU*

<sup>1</sup> Kayak Oudi Nug miag ipunigte, haen gamag imupa danab laala ag oolagpa genab doyak uuna, ag ouđi ham bupuak dilag nai amu ouđi nau dilag nai ele dim lamidkulag. <sup>2</sup> Doyak amuam ham bupuak danab ag kobol ham bupuak henana, nai ham bupuak amu yaaeg beṭe. Ham bupuak danab amu ag oolag amu ahilag dab maknu od ele maiteb amunu ag ahilag hipuninnu dab ii medṭeb. <sup>3</sup> Danab amu ag nug awak kobolnu aib anana, e laalanu, Kayak Nug danab ag oolagpa genab dooṭeb, nai genab ele dooṭeb, ag e amunu Kayak binag menana, e amu aon lakulaggnu aum ele amu, ham bupuak danab amu ag e amu ele lakulaggnu aib aṭeb. <sup>4</sup> Ig dooṭem, keeke oh Kayak heum amu ig Nug amegpa, “Ena hen mekame,” atata aognig. Gedidkunignu ele iita. <sup>5</sup> Adinu? Keeke amu oh Kayak naipa amu unuqitakpa ele ig aot lakunignu elele daaṭe amunu ig aognig.

<sup>6</sup> Na maṭiak imu amu i laintad amelagpa madikut amu na Kristus Jesusnu ehanitak ena daakut. Na anam hekut amu na am danab oopa genab doyak gagaṭag ele amu na doyak ena oh, dab mak ele aona dim lamidna oiṭem amu danab ipuanadkut. <sup>7</sup> Amge na kaya nai hamu, meu iita ele amu, na dab aib meme. Na Kayak kobolnu amu, na am bak ele daakutnu wagai men hena oiye! <sup>8</sup> Adinu? Ig bedunig ehanitaknu udat hak amu nakokib ehanigte amge Kayak kobol amu nug keeke ohnu ehanigte. Nug ig gemu bau daaṭem amunu ehanigte amu bauklel dimpa udieb aognig amunu ele ehanigte. <sup>9</sup> Nai imuam genab, danab

ag oolagpa genab dooglagnu eledenab. <sup>10</sup> Nai am inam. Ig Kayak bauklel, Nug danab ah oh edua awikak diig daate, Nug danab ah ag nuhignu oolagpa genab dooteb ele, ag genab edua awikom daateb amu, ig nuhignu oonigpa genabnab dootta, Nug doa ehanigkunu ameg metem. Ig amunu am genabib dootem amunu ig udat nadinab gagatag ele hetem.

<sup>11</sup> Na nai amu danab ah oh amelagpa matinna ipuanadpe, ag dim lamiteg! <sup>12</sup> Na amu nid bau amunu danab ag ehed dooidmananu na enaib oiye! Na mauhnoak aib oime. Iita! Na nai matiak amu oiyak amu oo mauhak amu oopa genab doyak amu kobol tutuku nahip elepa, danab ag Jesusnu oolagpa genab doopig ele amu, ag nahip kobol amu oh anidna dim lamidkulagnu elele daaglagnu oiye! <sup>13</sup> Na da amel metem, haen imupa amu, na tamaniakpa Kayak nai eb qak udat henana, amunu mehuqna, ipunitak ele mate!  
<sup>14</sup> Haen tamaniaknu toliak danab ag epelag na badenpa meeg, na Kayaknu gagatag aome amu na amu daut aib atiom. Na gagatag amu Kayak udat hekutnu aome amu udat amu aib uume.

<sup>15</sup> Keeke amu oh amu na dab menan, udat he! Danab oh ag na udat nahip hekutnu dab mak aome ele amu, na dab mak amu tudidna, laa ele aotem anidkulagnu amu na hik niteb he! <sup>16</sup> Na naka kobol na hetem, amu nai, na amu danab ah ipuanadtem ele amu, na amu oh atog nona dab menana he! Haen oh na udat gagatag amunu hekut. Adinu? Na anam hekut amu udat nahip amupa na ititak aoppe, danab ah na oden dooteb ele amu, Kayak Nug ag edua diiku.

## 5

**TAMANIAKNU DANAB AH TOLITAKNU KOBOL ENA**

<sup>1</sup> Na danab kaino aib aidme. Iita, na mamen ehanidtem amubia ehanitak nai bodo etakpa ape doyard! Nid bau amu na amapad dilag dootem amubia ehanate! <sup>2</sup> Ah kaino amu na aninnu dootem amubia doonna ehanate! Nid ahin bau amu na apinmad bia doonna, kobol tutukupai ehanate! <sup>3</sup> Ah laa nug gamu mauhak, nid laa ele iita, qabnab dayeb amu na atog nona ehanite! <sup>4</sup> Amge ah qab nug bekodtai o iita alakudtai laa daanna amu ahilag udat anuqak amu ag anilkad mamelkad alalkad ele ag nob ena edun mataglagnu atog noadkulagnu daate. Ao, Kayak Nug kobol amunu oo gamag ahate. <sup>5</sup> Ah qab nug genab nuka baeg laipu daate amu nug Kayak ehanidkunu dab ma dayaya, tuqanpa amunpa ele unuqidte <sup>6</sup> amge ah qab nug nuka bedunu hakib dim lamidte amu nug aaku mauhak bia daate. <sup>7</sup> Na keeke imu danab ah amelagpa, ahilagpa nai laa ii daamanu, tutuku ape doyeg! <sup>8</sup> Am danab laa nug tiilag laipu daateb ele amu, ag oolagpa nuhikudnab anuqak dab madata amu dimpa laa oh ele dab madata atog noadte am ena amge laa nug anam ii dab madata, atog ii noadte amu nuhig oopa genab doyak am ham bupuak, nuhig ehed hak amu oopa genab doyak iita dilag edadte.

<sup>9</sup> Ah qab nug mad 60 editom dayeb, nug gamu laipuib ele dayom dayeb, <sup>10</sup> nug udat ena laala oh heum dayeb, nuhikud nid ena atog noata omaladtom dayeb, ab laapanu do danab e madtom dayeb, Kayaknu danab ah atog noadtom dayeb,

laa qagaitakpa daaegeg ehanatom dayeb amu nug udat ena laala oh heum ele dayeb amu, ah qab amu na nug onig ah qab laa, ehaniatak aoglagnu, onilag ele laipu ye!

<sup>11</sup> Amge na ah qab, ag ah bau amu, ag onilag aib yaame. Adinu? Ag bedulagnu eedak doon, ag danab baula aoglagnu henana, Kayaknu udat di metaglag.

<sup>12</sup> Amupa ag anen anen ag anuka, “Da Kayaknu udatib dab mekul,” madipig amu ag heeg, iita mete amunu ag epediak aoglagnu daateb. <sup>13</sup> Laa ele,

ag udat ii hak kobol aona, lag lag tena nenana oiteb. Amu udat ii hak kobolib iita, ag nai, laa dilagnu aona, nai ham bupuak laala ele matieg ta, matieg neene, nai ehed ig akunignu elele iita amu maditeb. <sup>14</sup> Amunu ah bau qab mak amu, ag danab bau aona, nid menunna, ag laulag atog nokulagnu do metem. Ag anam hepeg amu keked laa ag ihinignu nai nau matiglagnu ib laa ii anidmana.

<sup>15</sup> Na dootem, ah laala Kayak di metanna, ag aaku ib ena edidna, Satan dim lamidteb.

<sup>16</sup> Amu tamaniak nug ah qab, nug nuka baeg laipu, nug ehanidkunu elele daakunu amu Kristen ah laa, nug oopa genab doote ele amu, nuhigpa ah qab laa dayeb amu, nug ehaniqad! Kristen tamaniak ug aib metom.

<sup>17</sup> Ag kristen danab, ag kristen tamaniak iki danab ag tamaniaknu udat ena heteb ele amu, ag danab amunu enanagnab doyeg! Amu kristen tamaniak iki danab, amu oolagpanu laala ag Kayak nai mehuqna, danab ah ipuanadteb ele amu, ag amu dilagnu amu ag anuqaknab doyeg!

<sup>18</sup> Amuam Kayak nai ate amubia. “Bulmakau nug

wit mumudte amu, na nug ode aib hautme.” Laa ele, “Udat nid nug nuhig udat nob aokunu elele.”  
 19 Am danab laipu laa nug, “Iki danab imu nug ehed heum,” ab amu na amu aib doome. Danab adit o ewam ag anam apeg amu na doye! 20 Am danab laa hipunin haaha daaku amu na danab ah noolagpa daug batan, tutuku mete! Amupa amu danab laala oh ele badan, hipunin ii hemana. 21 Kayak amu Kristus Jesus amu Kayaknu engel oh ele noolagpa da tutuku na amenpa iiku atem. Na udat amu tutuku atog no! Na atog nonana amu na ameg laa dilagpa nai bodo etak anana, ameg laa dilagpa nai gagaṭag aib maṭime. 22 Na danab laa paha aon, tamaniak iki daakunu epen badepa aib meme. Na laa ag hipunin heteb ele amu, na ag ele hipunin aib hepig! Na naka bedun atog nonana, opia awak daye! 23 Na bedunpa ode daate amunu na le hamuib am aib lame, wain nakok ele labepe, na ootpa ode, haen oh ba daate amu, heeb ehanidku. 24 Am danab ah laala dilag hipunin amu miag atiak ba, epediakpa tatam gote amge laa am ahilag hipunin lokumak dayaya, dimpa epediak haenpa miag atite. 25 Amubiaib kobol ena laala amu geha iiku miag atiak bete. Laa dilag amu paha miag atiak ii bete amge amu ele am haen oh lokumak daakunu iita.

## 6

### *BEGBEG DANAB DILAG NAI*

1 Danab ah ag Kayak onignu amu kristen kobolnu ele nai nau amananu, begbeg danab oh ag dab mak inam aoglag. “Da dahil gumak, nug

danab ena amunu da nug binag mekul.” Ag anam aon akulag. <sup>2</sup> Begbeg danab ag Kristen daateb amu ahilkad okai ele Kristen daateb amu begbeg amu ag ahilkad okai dilagnu, “Nug am kristen, layalib, nug am keeke hamu amunu da nug ode tabapi neku,” aon aib apig. Iita ag inam akulag. “Nug am Kristen amunu da nuhignu ool mauhte. Nug am kristen amunu nuhigpa udat hetem amupa nug keeke ena aote am ena.” Ag dab mak anam aonna, udat ena hekulag. Keeke imu danab ah ag hekulagnu ipuanadna humadpe, ahan dim lamiteg!

### *KEEKE KUDUM AWAKNU KOBOL*

<sup>3</sup> Laa nug ihinig Nadi Jesus Kristusnu nai, Kayaknu kobol tutuku nu nai ele amu, nug nai tutuku amu uua, ipunitak hamu meu iita, nai imu ele laipu iita amu madiku amu ig doognig, <sup>4</sup> danab amu nug hamu, iki okai kobol aakuib hete. Nug doyak laa ele iita. Nug od mak hamu ge iita hekunu, nai diignu, naipa nug meh qak kobol amu ele hekunu oo okai daate. Kobol amupa kobol nau diigdiig ele beteb. Am inam. Danab laanu oo nauhak doyak kobol, naipa nug qak kobol, wan yak nai matiak kobol, layagnu dab mak ehed awak kobol amu <sup>5</sup> danab ag ahilag dab mak augigiak ele, ag haen oh oolag laipu iita ele oiteb. Nai genab amu ag ii adateb, oolagpa ele ii daate. Ag oolagpa Kayak nainu, “Keeke udat iitapa, hamu awaknu ib aaku,” aon ateb.

<sup>6</sup> Amge danab nug Kayaknu kobol tutuku dim lamitata, nuhig keekepa, “Aaku elele,” dab mete amu nug enaib daate, keeke oh awom bia. <sup>7</sup> Adinu? Bau menuak haenpa ig keeke laa ele ii domut,

mauhak haenpa ele ig keeke laa aot ii gomata<sup>8</sup> amunu amu takaknu keeke elele, e ele elele dayeb amu ig, “Imu am dahilnu elele,” aot akunig.<sup>9</sup> Amge laa ag enulag kudum ele daaglagnu dab mak huanak aoteb amu ag ehed hekulagnu eedak aona, nena qeteb. Ag ameg qaknu keeke, meu iita ele amu, ag amunu mauhna, kaaka aqe oina, padal meteb.<sup>10</sup> Keeke nau ohnu diig amu enubnu oo mauhak kobol. Danab laala ag enub ele daaglagnu wagai meteb ele amu, ag aaku oopa genab doyak kobol pakuna, ug kudum aaku aopig.

***IG BAU DAYAK HAEN OHNU GAGATAG ADA DAYAKNU NAI***

<sup>11</sup> Amge na Kayaknu danab, na keeke amu oh di metan, awaidna daye! Na kobol tutuku, kobol Kayak Nug amunu oo hete, oopa genab doyak kobol, nug oo mauhak kobol, gagatag dayaya ug oh mawaknu kobol, oo mak kobol ele adan oiye!<sup>12</sup> Ban ameg laa amu ban ameg laa ele a nug edidkulahnu nug meh qetep amubia na oopa genab doyaknu wagai men he! Na bauklel, Kayak Nug anuka na amu aokutnu oninpa eum ele amu, na amu hanhannu gagatag ade! Kayak Nug na oninpa e, na nahip oopa genab doyak, danab ah kudum amelagpa miag matime.<sup>13</sup> Kayak, Nug keeke oh bau madate ele, Nug noobpa amu Kristus Jesus, Nug Pilatus amegpa nuhig diig tutuku matiom amu, Nug noobpa ele da nai imu na medatem.<sup>14</sup> Nai am inam. Na Kristusnu nai tutukunab elelenab dim lamidpe ukeb, ihinig Nadi Kristus Jesus, nuhig haen miag atieb batakut.<sup>15</sup> Kayak Nug nuhig haen epediom daate, haen amupa amu Kayak Nug heeb, Kristus miag atiku. Kayak Nug

am binag okai ele, Nug nukā am okai daate. Nug am king dilag King am okai dilag Okai. <sup>16</sup> Nug nukā aakuib ii mauhte. Amahlak ig gukuidta gokunignu elele iita ele amu Nug amupa daate. Danab laipu laa ele Nug ii antom, laa anidkunu ele elele iita. Nug binag amu nuhig gagatag haen oh ele nuhigpa dayed! Amu genab.

<sup>17</sup> Danab ah wan imupanu keeke kudum ele amu tutuku ape doyeg! Ag aka ag binalag aib mepig. Ag keeke oh paha nauhte eb ele amunu oolagpa genab aib doopig. Ag Kayak, Nug nukā aakuib keeke ena ena kudum, ig oonig gamag ahakunu megte ele amu, ag nuhignu aakuib oolagpa genab doyeg!

<sup>18</sup> Laa amu danab ah amu ag udat tutuku, ena, dab makenapa henana, ag danab ah ehanadnana, ag enulag laih opatna, danab laa do ele mateg!

<sup>19</sup> Ag anam hekūlag amu ag keeke kudum dimpa ehanadkunu, ag bau dayak genab aoglagnu qag mekulag.

<sup>20</sup> O Timotius, Kayak Nug udat na metom amu na atog nona, dab metanna he! Na nai hamu, Kayak nai dim ii lamidte amu doyak ham bupyak, doyak amunu amu wanpan danab ag, “Doyak genab,” ateb amge anam iita, na keeke adit amu aib dim lamidme. <sup>21</sup> Danab laala ag, “Ig doyak genab amu aomut,” ateb ele amu, ag aaku ahilag oopa genab doyak amu nai genab ele uupig.

Kayaknu ehanitak okai hamu megte amu nahippa dayad!

**KAYAKNU NAI Tituanak Bau**  
**The New Testament in the Nobonob Language of**  
**Papua New Guinea**  
**Nupela Testamen long tokples Nobonob long Niugini**  
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 21 Feb 2024 from source files dated 31 Aug 2023

ed374bb9-d819-53d1-a85b-f86cce3892e1